



## Program Bakti Siswa boleh bantu kerajaan

PAPAR: Menteri Pertanian dan Industri Makanan Sabah, Datuk Abdul Rahim Ismail berkata, Program Bakti Siswa, program anak angkat anjuran pelajar institusi pengajian tinggi (IPT) awam dan swasta, boleh dijadikan wadah untuk membantu meningkatkan kecekapan sistem penyampaian kerajaan.

Katanya, melalui program seumpama itu, mahasiswa yang berpendidikan tinggi akan ditempatkan bersama dengan keluarga angkat di sesuatu kampung, berpeluang memahami keperluan sosio ekonomi setempat dan memikirkan langkah mengatasi atau memperbaikinya.

"Anak muda (pelajar IPT) ini boleh membuat kertas cadangan sebagai hasil daripada projek bakti siswa dan dikemukakan kepada pemimpin setempat seperti Jawatankuasa Kemajuan dan Keselamatan Kampung (JKKK), agensi kerajaan seperti Jabatan Pertanian, Lembaga Kemajuan Ikan Malaysia (LKIM) malah kepada saya (kementerian) sendiri bagaimana untuk membantu masyarakat menaikkan taraf sosio ekonomi mereka.

"Melalui cara ini, pelajar secara tidak langsung, dapat membantu kerajaan untuk mengenalpasti keperluan masyarakat setempat dan seterusnya mengambil langkah perlu bagi mengatasinya," katanya ketika merasmikan Program Bakti Siswa Desa Wawasan, di Kampung Berundong, dekat sini, pada Ahad.

Program seminggu itu, yang disertai 40 pelajar Universiti Malaysia Sabah (UMS) termasuk dari Semenanjung dan Sarawak, ialah anjuran bersama Jabatan Kemajuan Masyarakat (Kemas) dan Majlis Perwakilan Pelajar UMS (MPPUMS).

Abdul Rahim, yang juga Ahli Dewan Undangan Negeri (Adun) Pantai Manis berkata, memandangkan usaha memperbaiki taraf sosio ekonomi masyarakat, khususnya yang tinggal di luar bandar memerlukan perubahan menyeluruh termasuk daripada segi minda, peranan pelajar IPT amat diperlukan.



AS  
AYSIA SABAH